



**SMJERNICE ZA OBJAVLJIVANJE SUDSKIH I TUŽILAČKIH ODLUKA, AKATA I
INFORMACIJA O PREDMETIMA**

Mart, 2024. godina

Transparentnost pravosuđa ključan je element demokratskog društva koje želi osigurati jednakost pred zakonom i pravičnost za sve. Objavljivanjem sudskih presuda i tužilačkih odluka, omogućuje se građanima uvid u rad pravosudnih institucija čime se jača povjerenje u pravosudni sistem. Također, na taj način potiču se učesnici u sudskim postupcima na veću odgovornost i transparentnost u svom radu, osiguravajući pravednost u donošenju odluka.

Nakon godinu i po dana rada i šest održanih sastanaka, Radna grupa za analizu i unapređenje objavljivanja tužilačkih i sudskih odluka sastavljena od članova pravosudne zajednice i VSTV-a, uz stručnu i administrativnu podršku Odjela za sudsku dokumentaciju i edukaciju Sekretarijata VSTV-a BiH, utvrdila je nacrt Smjernica kojima se definiše postupak i način proaktivnog, i u određenoj mjeri reaktivnog objavljivanja sudskih i tužilačkih odluka, akata i drugih informacija o predmetima.

Svjesna činjenice da ne postoji univerzalan model za objavljivanje sudskih i tužilačkih odluka, Radna grupa se rukovala prvenstveno potrebama bosanskohercegovačkog društva za što boljim pristupom odlukama pravosudnih tijela, imajući u vidu složenu organizaciju pravosuđa kao i postojanje četiri pravosudna sistema u Bosni i Hercegovini.

Uvjereni da pravda ne smije biti samo izrečena, već da mora biti vidljiva za sve, jer samo tako se mogu graditi temelji pravednog društva u kojem svi građani imaju povjerenje u pravosudni sistem, Radna grupa smatra da će usvajanje novih Smjernica i njihova dosljedna primjena održati kontinuitet napredovanja u procesu postizanja transparentnosti pravosudnog sistema, koji je notiran i u Izvještaju Evropske unije za Bosnu i Hercegovinu za 2022. godinu.

Visoko sudsko i tužilačko vijeće Bosne i Hercegovine shodno članu 17. tačka 28. u vezi sa tačkom 24. Zakona o VSTV BiH („Službeni glasnik BiH”, broj 25/04, 93/05, 48/07, 15/08, 63/23 i 9/24) na prijedlog Radne grupe za analizu i unapređenje objavljivanja sudskih i tužilačkih odluka, na sjednici održanoj dana 21.3.2024. godine donosi

SMJERNICE ZA OBJAVLJIVANJE SUDSKIH I TUŽILAČKIH ODLUKA, AKATA I INFORMACIJA O PREDMETIMA

PREDMET I OBIM PRIMJENE

Smjernice se odnose na postupak i način proaktivnog objavljivanja sudskih i tužilačkih odluka, akata i informacija o predmetima.

Smjernice se odnose i na reaktivnu objavu u pogledu javnog interesa i pravila anonimizacije, uz napomenu da sudovi i tužilaštva prilikom reaktivne objave mogu dati i više informacija, pri tom poštujući zakone kojima se uređuje slobodan pristup informacijama i zaštita ličnih podataka.

CILJEVI SMJERNICA

Smjernicama se želi postići da se na teritoriju cijele Bosne i Hercegovine ujednači praksa sudova i tužilaštava u objavljivanju sudskih i tužilačkih odluka, akata i informacija o predmetima putem specijaliziranih web servisa.

Primjenom ovih Smjernica doprinijeće se postizanju optimalnog nivoa transparentnosti rada pravosudnih institucija, harmonizaciji sudske prakse i unapređenju pravne sigurnosti. Na taj način će se povećati odgovornost pravosuđa i povjerenje građana i drugih zainteresovanih subjekata u rad pravosuđa.

OSNOVNI PRINCIPI

Javnost

Sudske odluke, tužilački akti, kao i drugi sadržaji o predmetima precizirani ovim Smjernicama i aktima pravosudnih institucija predstavljaju javno dobro, te trebaju biti javno dostupni i redovno ažurirani.

Zaštita ličnih podataka

- 1) Lični podaci obrađivaće se u skladu sa zakonima i pravnim standardima uz poduzimanje propisanih mjera zaštite.
- 2) Pravo na privatnost može se ograničiti u predmetima od javnog interesa u skladu sa zakonima u Bosni i Hercegovini.
- 3) Lični podaci mogu biti objavljeni i uz izričitu pismenu saglasnost fizičkog lica, koje je prethodno poučeno od strane ovlaštenog uposlenika suda/tužilaštva o posljedicama davanja takve saglasnosti.
- 4) Pojedinač čiji se lični podaci obrađuju i dostupni su javnosti, ima pravo da pod određenim uslovima ishodi brisanje tih podataka u svjetlu prava na zaborav ¹(u slučaju rehabilitacije, brisanja sudske osude i dr.).

Tačnost i blagovremenost

- 1) Svako objavljivanje sadržaja predviđenih ovim Smjernicama treba sadržavati tačne i blagovremene informacije.
- 2) Sudovi i tužilaštva će postupati sa hitnošću prilikom obrade zahtjeva fizičkih lica za izmjenu ili brisanje objavljenih podataka, odnosno ispravku netačnih i dopunu nepotpunih podataka.

Jasnost i razumljivost

Prilikom objavljivanja sadržaja definisanih ovim Smjernicama, vodiće se računa da isti budu objavljeni na način koji je jasan i razumljiv javnosti i medijima.

¹ Pravo na zaborav- Lice čiji se podaci obrađuju ima pravo od voditelja obrade ishoditi brisanje ličnih podataka koji se na njega odnose bez nepotrebnog odgađanja ako više nisu neophodni u odnosu na svrhu obrade. (definicija preuzeta iz GDPR-a)

Kontinuitet

Pravosudne institucije će održavati kontinuitet objavljivanja sadržaja definisanih ovim Smjernicama, na način da će javnosti redovno pružati informacije o toku postupka u predmetima od javnog interesa do njihovog pravosnažnog okončanja.

Trajanje objave

Svi sadržaji definisani ovim Smjernicama koji se objavljuju na specijaliziranim web servisima i putem drugih informacionih kanala za komuniciranje biće dostupni javnosti i medijima dok se ne ostvari svrha njihovog objavljivanja, pri tom vodeći računa o *pravu na zaborav*.

Unifikacija objava i jednostavnost pristupa

- 1) VSTV BiH, sudovi i tužilaštva će unificirati mjesto i način objave sadržaja predviđenih ovim Smjernicama kako bi isti bili lako dostupni i pretraživi.
- 2) Anonimizacija ličnih podataka vršiće se u skladu sa Uputstvom za anonimizaciju VSTV-a BiH, tako da budu anonimizirani na isti ili sličan način radi jednostavne čitljivosti i razumijevanja takvih sadržaja i u anonimiziranoj formi.

ZNAČENJE TERMINA

Pojedini termini upotrijebljeni u ovim Smjernicama imaju sljedeće značenje:

Proaktivna transparentnost podrazumijeva aktivno nastojanje pravosudnih institucija da informacije u vezi sa njihovim radom i postupanjem u konkretnim predmetima, a koje su od interesa za različite ciljne grupe, budu blagovremeno identifikovane i adekvatno objavljene bez ikakvog prethodnog zahtjeva za pristup informacijama.

Reaktivna transparentnost podrazumijeva postupanje pravosudnih institucija po zahtjevima za pristup informacijama, kao i postupanja po različitim upitima koji dolaze iz medija i od drugih zainteresovanih lica.

Specijalizirani web servisi - web servisi na kojima se objavljuju sadržaji predviđeni ovim Smjernicama i to: službene web stranice pravosudnih institucija, centralna Baza sudskih odluka Bosne i Hercegovine, Portal sudske prakse Bosne i Hercegovine, Mapa sudskih predmeta od javnog interesa.

Anonimizacija- postupak obrade ličnih podataka s ciljem da se zaštiti identitet osobe na koju se podaci odnose.

Lični podaci - podaci potrebni za identifikaciju fizičkog lica definisani Zakonom o zaštiti ličnih podataka BiH.

Predmeti od javnog interesa u smislu ovih Smjernica su:

Krivični predmeti:

- a) krivična djela protiv čovječnosti i vrijednosti zaštićenih međunarodnim pravom,
- b) koruptivna krivična djela definisana listom koruptivnih krivičnih djela VSTV-a BiH,
- c) organizovani kriminal,
- d) terorizam,
- e) pranje novca,
- f) krivična djela u vezi sa utajom poreza,
- g) ubistvo i teška ubistva,
- h) trgovina ljudima,
- i) porodično nasilje,
- j) krivična djela u vezi sa neovlaštenom proizvodnjom i prometom opojnih droga,
- k) krivična djela iz mržnje,
- l) krivična djela protiv države i društvenog uređenja.

Parnični predmeti:

- a) diskriminacija,
- b) zaštita okoliša,
- c) autorska prava, zaštita intelektualne i industrijske svojine,
- d) rodna ravnopravnost,
- e) zaštita potrošača,
- f) stečaj,
- g) privatizacija,
- h) kolektivni sporovi,
- i) privredni sporovi sa inostranim elementom,
- j) sporovi o državnoj imovini.

Upravni predmeti:

- a) zaštita okoliša,
- b) konkurencija,
- c) koncesije,
- d) obrada podataka iz zbirke ličnih podataka,
- e) sloboda pristupa informacijama,
- f) izborne žalbe,
- g) javne nabavke,
- h) sukob interesa.

Sudovi i tužilaštva će provesti test javnog interesa i u drugim predmetima rukovodeći se i sljedećim kriterijima:

- 1) vrsta i težina krivičnog djela kao i predmet postupka,
- 2) svojstvo učesnika u postupku (npr. imenovani/izabrani dužnosnici u sudskoj, izvršnoj i zakonodavnoj vlasti, novinari, službena lica, javna lica i sl.),
- 3) ostali opravdani interesi javnosti (npr. stepen društvene opasnosti, pojavni oblik kriminaliteta, zaštićeno dobro, značaj odluke za širu društvenu zajednicu i sl.).

Odluke od značaja za sudsku praksu u smislu ovih Smjernica smatraju se:

- a) odluke u kojima je sud prvi put zauzeo neki stav (primjena novih zakona, novi instituti, odluke u pilot predmetima, odluke o spornom pravnom pitanju...),
- b) odluke u kojima je promijenjen ranije zauzeti stav istog suda, uključujući i odluke u kojima je sud promijenio shvatanje zbog odluke Evropskog suda za ljudska prava ili Ustavnog suda BiH,
- c) odluke koje se odnose na nove pravne lijekove,
- d) odluke u kojima je sud direktno primijenio Evropsku konvenciju za zaštitu ljudskih prava i osnovnih sloboda, ili koristio sudsku praksu Evropskog suda za ljudska prava ili drugog međunarodnog tribunala,
- e) odluke u kojima je sud primijenio međunarodni ugovor (npr. Bečka konvencija),
- f) odluke u kojima se sud pozvao na stav panela za ujednačavanje sudske prakse,
- g) odluke u kojima je dozvoljena vanredna revizija.

OBJAVLJIVANJE TUŽILAČKIH ODLUKA, AKATA I INFORMACIJA O PREDMETIMA

Za objavljivanje tužilačkih odluka, akata i informacija o predmetima koriste se službene web stranice tužilaštava i drugi informacioni kanali. Tužilaštva obavještavaju javnost o pojavama i problemima od opšteg značaja koja su zapazila u svom radu, te o predmetima u kojima postupaju, a sve u granicama i u skladu sa interesima postupka, sa posebnim akcentom na predmete od javnog interesa.

Objavljivanje tužilačkih odluka

Pod tužilačkim odlukama u smislu ovih Smjernica smatraju se optužnice, naredbe o neprovođenju istrage i naredbe o obustavi istrage.

1. Izvodi iz potvrđenih optužnica

Tužilaštva mogu objaviti izvode iz optužnica u svim predmetima bez ograničenja vezanih za prirodu i težinu krivičnog djela u skladu sa svojim kapacitetima i resursima, poštujući zakone i principe definisane ovim Smjernicama.

U predmetima od javnog interesa, tužilaštva će uz izvode iz optužnica objavljivati i odgovarajuća saopštenja za javnost.

Izvod iz optužnice sadrži:

- 1) naziv tužilaštva koje je podiglo optužnicu, broj i datum optužnice;
- 2) podaci o optuženoj osobi i to: ime i prezime, godina i mjesto rođenja, ako je riječ o predmetu od javnog interesa, odnosno anonimizirani podaci u ostalim predmetima. U slučaju pravne osobe, objavljuju se puni podaci o pravnoj osobi kako su navedeni u optužnici;
- 3) činjenični i pravni opis krivičnog djela, bez imena oštećenog/ih, svjedoka i trećih lica, i drugih podataka koji mogu otkriti identitet ovih lica;
- 4) pravna kvalifikacija krivičnog djela;
- 5) prijedlog za :
 - a. određivanje/produženje pritvora/mjera zabrane,
 - b. određivanje mjera osiguranja oduzimanja imovinske koristi,
 - c. donošenje privremene mjere osiguranja imovinskopravnog zahtjeva,
 - d. izricanje mjera bezbjednosti;

2. Informacije o podignutim optužnicama

Informacija o podignutoj optužnici može se objaviti i prije njenog potvrđivanja kroz saopštenje za javnost, i to po procjeni glavnog tužioca uz korištenje jednog od sljedećih kriterija:

- a) predmet izazvao poseban interes javnosti,
- b) osumnjičeni/a bio/la javna osoba/slужbeno lice
- c) podaci o osumnjičenom/oj od ranije poznati javnosti.

U ovakvim slučajevima kada optužnica djelimično ili u cijelosti ne bude potvrđena, preporučuje se tužilaštvima da objave i te informacije, a nakon što sud donese pravosnažnu odluku o optužnici.

3. Naredbe o neprovođenju istrage i naredbe o obustavi istrage

Naredbe o neprovođenju istrage i naredbe o obustavi istrage neće se objavljivati zbog interne prirode takvih akata, već će se javnost o istima informisati putem saopštenja za javnost, a nakon odluke po eventualno uloženom prigovoru, odnosno pritužbi. Tom prilikom potrebno je jasno navesti razloge njihovog donošenja, uz napomenu da u predmetima u kojima je obustavljena istraga uslijed nedostatka dokaza, protiv tih lica istraga se može ponovo otvoriti ako se pojave nove činjenice i dokazi koji ukazuju da postoje osnovi sumnje da je lice počinilo krivično djelo.

Izuzetno, ove odluke se mogu objaviti u integralnom tekstu u predmetima od javnog interesa, a po procjeni glavnog tužioca.

Objavljivanje tužilačkih akata

Ostali tužilački akti poput naredbe o provođenju istrage, te prijedlozi za određivanje pritvora/mjera zabrane i dr. neće se objavljivati zbog interne prirode takvih akata. Naime, ovi akti sadrže informacije čijim se saopštavanjem osnovano može očekivati izazivanje štete za legitimne ciljeve u sprječavanju i otkrivanju kriminala, odnosno informacije koje se između ostalog tiču i dokaza, a čije izlaganje javnosti može otežati ili onemogućiti sprovođenje pojedinih istražnih radnji ili ugroziti eventualne buduće istrage u takvim predmetima.

Preporučuje se glavnim tužiocima da po svojoj procjeni o donošenju ovih akata informišu javnost kroz adekvatna saopštenja, rukovodeći se kriterijima koji važe za informisanje javnosti o podignutim i nepotvrđenim optužnicama.

Objavljivanje ostalih informacija o predmetima u fazi prijave i istrage

Informacije o predmetima u fazi prijave i istrage u pravilu se neće proaktivno objavljivati. Izuzetno, ako je to u interesu predmeta, objektivnog informisanja javnosti ili na zahtjev zainteresovanih lica i medija objavit će se informacija o zaprimanju prijave i aktivnostima koje se poduzimaju u cilju donošenja tužilačke odluke.

Presumpcija nevinosti

Prilikom objave tužilačkih odluka, akata i saopštenja za javnost, tužilaštva će vodeći računa o presumpciji nevinosti koristiti pravnu terminologiju koja odgovara fazi krivičnog postupka.

Klauzula presumpcije nevinosti treba vidljivo istaknuta kako bi se javnost na jasan način upoznala sa pravnim statusom lica protiv kojeg se vodi krivični postupak, i to u sljedećem obliku:


„Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.“

Trajanje objave

Optužnice u predmetima od javnog interesa biće objavljene u trajanju dvije godine. Ostale odluke, akti i informacije biće objavljene u trajanju do jedne godine.

Ukoliko prije isteka roka trajanja objave bude donesena pravosnažna sudska odluka, optužnica u tom predmetu ili druge informacije uklonit će se u roku od 30 (trideset) dana od dana pravosnažnosti sudske odluke.

OBJAVLJIVANJE TUŽILAČKIH ODLUKA I AKATA



OBJAVLJIVANJE SUDSKIH ODLUKA, PRAVNIH SHVATANJA I INFORMACIJA O PREDMETIMA

Za objavljivanje sudskih odluka, informacija o predmetima, te stavova sudske prakse i pravnih shvatanja sudova najviše instance, koriste se službene web stranice sudova, Baza sudskih odluka, Portal sudske prakse, Mapa sudskih predmeta od javnog interesa.

Službene web stranice

Na službenim web stranicama sudova će se objavljivati pravosnažne sudske odluke, te informacije o predmetima u toku.

Pravosnažne sudske odluke

Objava pravosnažnih sudskih odluka vršiće se uz poštivanje zakona i principa definisanih ovim Smjernicama, prema sljedećim kriterijima:

- a) odluke od javnog interesa,
- b) odluke od značaja za sudsku praksu,
- c) odluke u kojima postoji zakonska obaveza objavljivanja,
- d) odluke za koje je iskazano interesovanje profesionalne, akademske zajednice, medija i javnosti,
- e) druge odluke koje po ocjeni suda imaju prioritet u objavljivanju.

Pravosnažne sudske odluke objavljivaće se u posebnoj sekciji web stranice u modulu „SUDSKE ODLUKE“, koji se do sada nazivao SUDSKA PRAKSA.

Prilikom objavljivanja sudskih odluka, a radi njihove preglednosti potrebno ih je razvrstati po oblastima i pravnim terminima.

Minimum podataka koje sudovi trebaju obezbijediti:

Krivični predmeti:

- Naziv krivičnog djela, broj predmeta i kratki opis pravnog instituta

Građanski, privredni i upravni predmeti:

- Podoblast, vrsta i predmet spora, broj predmeta i kratki opis pravnog instituta

Pravna shvatanja	›	Krivična djela protiv čovječnosti i vrijednosti zaštićenih međunarodnim pravom
Krivično materijalno pravo - opšti dio	›	
Krivična djela protiv čovječnosti i vrijednosti zaštićenih međunarodnim pravom	›	• 097-0-K2-07-000 001 Ratni zločin protiv civilnog stanovništva • 097-0-K2-07-000066 Ratni zločin protiv civilnog stanovništva • 097-0-K2-09-000 039 Ratni zločin protiv civilnog stanovništva; odluka Ustavnog suda BiH, broj AP-2152/09, odbijena apelacija • 96 0 K 005425 10 Kž - Ratni zločin protiv civilnog stanovništva, Ratni zločin protiv ratnih zarobljenika • 96 0 K 031177 12 Kž - Ratni zločin protiv civilnog stanovništva • 96 0 K 013003 12 Kž 3 (Ratni zločin protiv civilnog stanovništva) • 96 0 K 006622 13 Kž - Ratni zločin protiv ratnih zarobljenika • 96 0 K 040290 13 Kž 12 - Ratni zločin protiv civilnog stanovništva; odluka Ustavnog suda BiH, broj AP-5150/13, odbijena apelacija • 96 0 K 039051 12 Kž 2 - Ratni zločin protiv civilnog stanovništva • 96 0 K 020424 15 Kž - Ratni zločin protiv civilnog stanovništva, Ratni zločin protiv ratnih zarobljenika; odluka Ustavnog suda BiH, broj AP-5730/15, odbijena apelacija, odbačena apelacija advokata • 96 0 K 024956 15 Kž 8 - Ratni zločin protiv civilnog stanovništva, Ratni zločin protiv ratnih zarobljenika; odluka Ustavnog suda BiH,
Krivična djela protiv države	›	
Krivična djela protiv života i tijela	›	
Krivična djela protiv slobode i prava čovjeka i građanina	›	
Krivična djela terorizma	›	

Primjer 1.

Pravna shvatanja	›	Radno pravo
Sporna pravna pitanja	›	• 097-0-GŽ-06-000553 zahtjev za poništenje-odluke o otkazu i povrat na posao • 097-0-GŽ-09-000195 odluka o naknadi troškova-polaganja pravosuđnog ispita
Stvarno pravo	›	• 96 0 P-002771 10 Gž - isplata plata i godišnjeg odmora • 96 0 P 004162 12 Gž - zaštita prava iz radnog odnosa (nezakonit otkaz i vraćanje na posao)
Obligaciono pravo	›	• 96 0 P 004836 11 Gž - zaštita prava iz radnog odnosa • 96 0 P 039742 13 Gž 2 - utvrđenje nezakonitosti otkaza i isplata • 96 0 P 039742 18 Gž 4 - utvrđenje nezakonitosti otkaza i isplata
Nasljedno pravo	›	• 96 0 P 051298 14 Rsž - povrat na posao, isplata ličnih dohodaka i doprinosa

Primjer 2.

Žig

21.06.2023.

- 96 0 Ps 004417 12 Pž (Povreda prava na žig, Apelacioni sud Brčko distrikta BiH preinačio prvostepenu presudu i odbio tužbeni zahtjev, revizija odbačena)
- 96 0 Ps 024704 12 Pž (Povreda prava na žig, usvojen tužbeni zahtjev)
- 96 0 P 003179 15 Gž 3 (Povreda prava na žig, usvojen tužbeni zahtjev za naknadu materijalne štete, Apelacioni sud Brčko distrikta BiH preinačio prvostepenu presudu na način da je odbio dio tužbenog zahtjeva koji se odnosi na nematerijalnu štetu; odluka Ustavnog suda BiH, broj AP-4828/16, povreda člana 6 - suđenje u razumnom roku, u ostalom dijelu odbijena apelacija)
- 96 0 P 003179 15 Gž 3 (SENTENCA)
- 96 0 P 003179 16 Rev (Povreda prava na žig, usvojen tužbeni zahtjev za naknadu materijalne štete, Apelacioni sud Brčko distrikta BiH preinačio prvostepenu

Primjer 3.

Trajanje objave

Trajanje objave treba biti ograničeno do godinu dana, osim ako svrha objavljivanja ne zahtijeva duži vremenski rok, sa primjerenim stepenom anonimizacije u skladu sa ovim Smjernicama i Uputstvom za anonimizaciju VSTV-a BiH.

Vremensko ograničenje trajanja objave ne odnosi se na sudove najviše instance, odnosno Vrhovni sud Federacije Bosne i Hercegovine, Vrhovni sud Republike Srpske, Apelacioni sud Brčko distrikt BiH i Sud Bosne i Hercegovine.

Pravosnažne odluke koje se objavljuju na web stranicama istovremeno se dostavljaju VSTV-u BiH u word formatu uz prateći obrazac i u anonimiziranoj formi radi njihove trajne pohrane u centralnoj Bazi sudskih odluka.

Informacije o predmetima u toku

Sudovi će informacije o predmetima u toku, uključujući i informacije o nepravosnažnim odlukama objavljivati u formi saopštenja za javnost, u kategoriji pod nazivom ODNOSI SA JAVNOŠĆU, potkategorija VIJESTI, sekcija SAOPŠTENJA ZA JAVNOST, dok se u sekciji AKTUELNOSTI objavljuju isključivo informacije o redovnim aktivnostima suda i opšte informacije.

Izuzetno, u predmetima od javnog interesa, uz saopštenje za javnost kojim se daje informacija o nepravosnažnim odlukama, može se objaviti i izreka odluke u pdf formatu.

Sudovi putem saopštenja za javnost mogu objaviti informacije i o pravosnažnim sudskim odlukama, s tim da će integralni tekst pravosnažne odluke javnosti biti dostupan putem linka koji će upućivati na kategoriju SUDSKE ODLUKE.

Raspored suđenja

Zbog izuzetne važnosti rasporeda suđenja za javnost i medije, potrebno je:

- da se unificira naziv ove potkategorije na način da se zove RASPORED SUĐENJA,
- da se unificira mjesto objave, na način da se ova potkategorija objavljuje u kategoriji OGLASNA PLOČA, i
- da RASPORED SUĐENJA bude dostupan i na naslovnoj web stranici u gornjem desnom uglu.

Raspored suđenja treba sadržavati naziv stranke, broj predmeta, satnica, , vrsta spora/naziv krivičnog djela, ime postupajućeg sudije i faza postupka.

Navedeni podaci se čuvaju onoliko dugo koliko je potrebno da se ispuni svrha objave.

Sudovi trebaju voditi računa da redovno ažuriraju RASPORED SUĐENJA na način da informacije o suđenjima u predmetima od javnog interesa budu dostupne javnosti najmanje 48 sati prije zakazanog ročišta.

Baza sudskih odluka Bosne i Hercegovine

Baza sudskih odluka je centralno mjesto za objavu pravosnažnih odluka svih sudova u Bosni i Hercegovini radi njihovog trajnog pohranjivanja na jednom mjestu i dostupna je na web stranici <https://csd.pravosudje.ba/vstvfo/B/142/kategorije-vijesti/141/simple>.

VSTV BiH će prioritetno, putem Odjela za sudsku dokumentaciju i edukaciju VSTV-a BiH, obezbjediti redovno ažuriranje baze sa svim odlukama od javnog interesa i drugim pravosnažnim odlukama koje su predmet specijaliziranih istraživanja.

Mapa sudskih predmeta od javnog interesa

Specijalizirano mjesto gdje su korištenjem Google mape predstavljene sažete informacije o pravosnažnim predmetima od javnog interesa vidljivi po mjestu presuđenja i drugim kategorijama ovisno o vrsti predmeta.

VSTV BiH će periodično inicirati prikupljanje pravosnažnih sudskih odluka radi redovnog ažuriranja ove Mape.


Portal sudske prakse Bosne i Hercegovine

Portal sudske prakse je specijalizirano mjesto gdje se objavljuju pravni stavovi sudske prakse i pravna shvatanja sudova najviše instance u Bosni i Hercegovini sa pratećim odlukama, a koji je dostupan na web stranici <https://sudskapraksa.pravosudje.ba/>.

U dijelu Portala pod nazivom „stavovi sudske prakse“ objavljuju se stavovi sa pratećom anonimiziranom odlukom iz koje je taj stav proizašao, te drugim odlukama koje su neophodne za pravilno razumijevanje tog stava.

U dijelu Portala pod nazivom „pravna shvatanja“ objavljuju se pravna shvatanja usvojena na sjednicama sudskih odjeljenja.

OBJAVLJIVANJE SUDSKIH ODLUKA, PRAVNIH SHVATANJA I INFORMACIJA O PREDMETIMA



DRUGI INFORMACIONI KANALI ZA KOMUNICIRANJE

Sudovi i tužilaštva mogu koristiti i druge informacione kanale za komuniciranje sa medijima i drugim ciljnim grupama predviđene Komunikacijskom strategijom VSTV BiH.

Pravila objavljivanja detaljno precizirana ovim Smjernicama, primjenjuju se i za objavljivanje putem drugih informacionih kanala.

PROVEDBA SMJERNICA

- Praćenje primjene Smjernica vršiće Radna grupa VSTV-a BiH za analizu i unapređenje objavljivanja sudskih i tužilačkih odluka.
- Potrebno je da VSTV BiH i dio pravosudnih institucija koje su svojim aktima uredili proceduru objavljivanja sudskih i tužilačkih odluka, akata i drugih informacija, u roku od 90 dana od dana usvajanja ovih Smjernica svoje akte prilagode novim Smjernicama.
- Pravosudne institucije koje do danas nisu donijele provedbene akte će u roku od 90 dana donijeti iste, te definisati uređivačku politiku i tijelo koje će biti zaduženo za provođenje Smjernica.
- Pored uređivačkog tijela, potrebno je da svaka institucija obezbijedi osoblje koje će pružati tehničku pomoć u procesu anonimizacije i objave sadržaja definisanih ovim Smjernicama.
- Neophodno je da sve osobe uključene u ovaj proces na strateškom i operativnom nivou dobiju odgovarajuću obuku.
- O donošenju provedbenih akata i uređivačkom tijelu zaduženom za provođenje Smjernica, pravosudne institucije obavijestiće Radnu grupu i VSTV BiH putem Odjela za sudsku dokumentaciju i edukaciju.
- Radi vršenja nadzora nad provedbom Smjernica, Radnoj grupi VSTV-a će se redovno staviti na raspolaganje informacije iz godišnjih izvještaja pravosudnih institucija o ovom segmentu rada, kao i druge informacije o primjeni Smjernica.
- Radna grupa VSTV-a BiH će periodično, a najmanje jednom godišnje obavještavati VSTV BiH o svojim nalazima i eventualnim preporukama.

PREPORUKE

- Pitanje objavljivanja sudskih i tužilačkih odluka potrebno je zakonski regulisati.
- Prilikom rada na predmetima od javnog interesa, treba voditi računa da se javnost blagovremeno i tačno informiše o radu na predmetu u skladu sa Smjernicama.
- Preporučuje se nosiocima pravosudnih funkcija da prilikom pisanja odluka i akata, lične podatke navode samo u neophodnoj mjeri i istim redoslijedom, imajući u vidu da iste mogu biti objavljene. Pisanje odluka i akata na ovakav način olakšaće složen i zahtjevan proces anonimizacije, a u konačnici obezbijediti lakše razumijevanje objavljene odluke i u anonimiziranoj formi.
- Radi adekvatnog praćenja i izvještavanja o predmetima od javnog interesa kroz različite stadije postupka, Radna grupa je mišljenja da bi bilo korisno obezbijediti tehničke mogućnosti za označavanje predmeta od javnog interesa kroz sistem CMS/TCMS.
- Prilikom kreiranja saopštenja za štampu o nekom predmetu ili komuniciranja informacije o nekom aktu prema medijima/javnosti, neophodno je odgovoriti na pitanja: šta se desilo, šta je preduzeto i šta će se preduzeti. Ukoliko na neko od ovih pitanja nije moguće odgovoriti zbog zakonskih ograničenja, potrebno je da se razlog ne davanja informacija jasno iskomunicira. Pripremom saopštenja na ovaj način mediji/javnost će dobiti sveobuhvatnu i sažetu informaciju bez potrebe da je dodatno istražuju i dopunjavaju, što će doprinijeti pravovremenom informisanju, ali i spriječiti mogućnost pogrešnog interpretiranja informacije.
- Radna grupa predlaže VSTV-u BiH da u saradnji sa Vijećem za štampu i drugim partnerskim udruženjima periodično inicira obuke novinara kao društvenih kontrolora vlasti i čuvara javnog interesa kako bi se upoznali sa osnovama sudskih postupaka, pravnom terminologijom i razlozima zbog kojih se neke informacije ne mogu ustupiti javnosti, a radi kvalitetnijeg izvještavanja o radu pravosuđa.
- Za pribavljanje saglasnosti za obradu ličnih podataka fizičkih lica, sudovi i tužilaštva koriste obrazac koji će se predložiti svim učesnicima po mogućnosti prilikom prvog kontakta sa sudom/tužilaštvom, a najkasnije do okončanja prvostepenog postupka, te da ove podatke učine dostupnim uređivačkom tijelu zaduženom za provođenje Smjernica.

- Svjesni činjenice da pravosudne institucije trebaju dodatne resurse za potpunu implementaciju ovih Smjernica, potrebno je iste predstaviti izvršnoj vlasti kako bi u sklopu finansiranja pravosudnih institucija odobrili sredstva i za njihovu implementaciju.
- Sudovi i tužilaštva prilikom realizacije projekata međunarodnih institucija i nevladinih organizacija koji su vezani za objavljivanje sudskih i tužilačkih odluka i akata trebaju postupati u skladu sa Smjernicama.

Broj: 07-02-3-1279-3/2024

Sarajevo, 21.3.2024. godine



Predsjednik
Halil Lagumdžija